

Pleiv Rueun Ruschein Siat Pigniu

Protocol dalla radunanza generala dils 23-08-2020 allas 19.00 uras a Rueun

Beinvegni ed appel

Punctual arva il president Hugo Schär la radunanza e beneventa tuttas presentas e tuts presents cordialmein. Ord motivs dalla pandemia da corona ha la radunanza stuiu veginr spustada per ca. 4 meins.

Participaziun: 46 parochianas e parochians cun dretg da vuschar.

Perstgisas: Albert Spescha

Memento:

Gion Cadruvi da Ruschein ei morts ils 30-07-2020 ella vegliadetgna da 89 onns. Tochen il davos eis el s`engaschaus exemplaricamein per la pleiv da s. Gieri . Gion ei staus 16 onns president dalla pleiv ed ha tochen la mort giu quitau e mantenui il tuchiez. Aunc avon 2 onns eis el entraus ella cumissiun dall'orgla nova, nua ch`el ha prestau grondiusa lavur. En num dall`entira pleiv vulein nus engraziar fetg a Gion Cadruvi per sia nunstunclenteivila lavur per la cuminanza. Car Gion, rauissa en pasch.

La radunanza cuntinuescha cun la gliesta da tractandas:

1. Elecziun da dus dumbravuschs
2. Protocol dalla radunanza generala dils 7-04-2019
3. Rapport dil president
4. Rapport digl augsegner
5. Rendament da quen 2019 e preventiv 2020
6. Rapport dallas revisuras ed approbaziun dil quen 2019 e preventiv 2020
7. Quen final renovaziun e sanaziun casa parvenda Ruschein
8. Quen final orgla nova ed isolaziun baselgia s. Gieri, Ruschein
9. Damonda da credit per electrificar tuchiez dalla caplutta s. Glieci, Siat

10. Damonda da credit per la revisiun totala dall'ura dalla baslegia s. Andriu, Rueun

11. Contract da servitut caplutta s. Antoni, Ruschein

12. Fixar il pei da taglia per il 2020

13. Elecziuns

a) suprastonza da pleiv

b) cumissiun da gestiun (revisuras)

14. Tablas da lenn entagliadas per la caplutta s. Gion, Siat

15. Orientaziuns

16. Varia

1. Elecziun da dus/ as dumbravuschs

Clara Cadruvi e Lorenz Alig vegnan tscharni ed elegi unanim.

2. Protocol dalla radunanza generala dils 7-04-2019

Il protocol sura numnaus ei staus publicaus liung temps sin la pagina d'internet dalla pleiv. Negin pretenda ina prelecziun.

Approbaziun, 45 gie ed ina resalva.

3. Rapport dil president

En siu rapport dat il president in sguard anavos sin igl onn vargau. En spezial menziunescha Hugo la finiziun dalla renovaziun totala casa parvenda Ruschein, sco era la finiziun dalla sanaziun parziale ed orgla nova baselgia s. Gieri Ruschein. Omisduas caussas seigien gartegiadas oreifer. Il president engrazia a tuttas e tuts che han sin ina moda u l'autra segidau da realisar quels dus projects.

Ord vesta administrativa seigi stau in onn plitost ruasseivel. La suprastonza hagi buca pli stuiu vegnir ensemens schi biaras gadas sco ils onns avon.

Il president engrazia a tuttas parochianas e tuts parochians per lur fidonza ed als consuprastonts per l'emperneivla e nuncumplizada collaboraziun.

4. Plaid digl augsegner

Igl augsegner entscheiva siu rapport cun statistica e vegn tier la conclusiun che nus hagien en nossa pleiv pli bia mortoris che battens.

Sur Thomas declara, ch`el hagi la responsabladat per la pastoraziun e la suprastonza per l`administraziun. Cun sustegn da calustras e catahettas emprovi el da fundar in cussegli pastoral. En collaboraziun seigi era gia reusiu da festivar messas per affons. Sur Thomas engrazia allas calustras, ellas seigien per el in grond sustegn. Era engrazia igl augsegner a tuttas e tuts per la preschientscha.

5. Rendament da quen 2019 e preventiv 2020

Il cassier Toni Albin presenta la bilanza, il quen da gudogn e sperdita per 2019 ch`ei serraus giu sin ils 31.12.2019 ed il preventiv per 2020.

Ils 31.12.2019 muossa la pleiv ora ina summa da bilanza da frs.2'085'776.04 da quei frs. 519'273.22 capital jester.

	Quen da gudogn e sperdita per 2019	preventiv2020
Total entradas	+290'592.10	+287'600.-
Total expensas directas	- 6'980..-	-8'300.-
Total cuosts da persunal/ funcziunaris	-183'696.05	-192'000.-
Total uleriuras expensas	-58'328.75	-70'000.-
Total deducziuns	-39'605.--	-13'200.--
Total resultatad da finanzas	<u>-1'105.61</u>	<u>-4'100.--</u>
Gudogn	<u><u>+876.69</u></u>	<u><u>0.00</u></u>

Ina damonda pertucont las deducziuns baselgias, vegn respundida cuntenteivlamein.

6. Rapport dallas revisuras ed approbaziun dil quen 2019 e preventiv 2020

Las revisuras Cornelia Coray e Claudia Tomaschett han revediu il quen 2019 e rapporteschan sco suonda: Ellas hagien controllau tut ils saldos activs e constatau che las expensas da persunal per l`instrucziun relegiusa ein sesminuidas. Plinavon seigi igl agen capital dils fondos da Rueun s`avanzai per rodund frs.36'000.- , quei grazia ad ina donaziun da frs. 50'000.- .

Era il quen dalla renovaziun totala, dalla casa parvenda Ruschein ei vegnius controllaus. Il preventiv da frs. 750'000.- seigi buca vegnius survargaus.

Sin fundament da lur controlla san ellas confirmar:

- che la bilanza ed il quen da menschi corispundi alla contabilitad
- tuttas cudischaziuns ein mussadas ora entras ils mussaments necessaris
- las vaglias cudischadas ein era avon maun
- las expensas ein fatgas tenor conclus dalla radunanza generala e sin fundament dalla constituziun
- las fatschentas ein vegnidias menadas sin fundament dalla constituziun.

Sin fundament dils resultads da revisiun, proponan las revisuras d`approbar il quen 2019 e da dar scarica alla suprastonza ed als funcziunaris.

In grond engraziament admettan ellas alla suprastonza, agl augsegner sco era a funcziunaris.

Sin basa da quei rapport vegn il quen 2019 ,sco era il preventiv 2020 approbaus unanim.

7. Quen final renovaziun e sanaziun casa parvenda Ruschein

Il preventiv da 750'000.- frs, concedius dalla radunanza generala dils 23-04-2018. Ils cuosts totals muntan a 744'265.65. frs

Susteniment dil cantun Grischun per la sanaziun energetica da 41'000.- frs.

Vischnaunca Ilanz/ Glion per la tualetta publica 46'000.- frs.

Il president Hugo engrazia en num dall`entira pleiv grondamein al surprendider e realisader Domenic Lanicca per sia exemplarica lavur. Tier tut

ch`ei hagi dau bein enqual surpresa nunspitgada hagi Domenic fatg tut per buca surtrer il preventiv.

La suprastonza ha decidiu da prender si ina hipoteca ferma, cun la summa da 450'798.80 frs. sin 10 onns cun in tscheins da 0.975 % .

8.Quen final orgla nova ed isolaziun baselgia s. Gieri, Ruschein

La cumissiun dall`orgla ha menau il quen independentamein.

Il quen muossa ora total entradas da 169' 950.40 frs.

ed expensas da 164'786.90 frs.

Conto manteniment d`orgla 5163.50 frs.

Il president engrazia grondamein alla cumissiun d`orgla per la fetg gronda lavur en favur dalla baselgia s.Gieri.

9. Damonda da credit per electrificar tuchiez dalla caplutta s. Glieci, Siat

La fundaziun caplutta s.Glieci ha obteniu ord l'ierta da Mathias Anton Cahenzli ina donaziun da 10'000.- frs. per il zenn.

Sin fundament da quella donaziun ha la suprastonza fatg ponderaziuns ed ein vegnir tier la conclusiun da sanar la sutga dil zenn, sco era igl indrez da tuccar ed electrificar il tuchiez. Total cuosts tenor l`offerta dalla firma Muff (Kirchturmtechnik) fleivel 12'000.- frs. Pia damonda la suprastonza per in credit brutto da 12'000.- frs. per l`entira sanaziun.

Ella discussiun crodan entgins votums ch`ein encunter da far quell`investiziun. Per exempl: Buca necessari etc.

La radunanza generala decida da conceder il credit da 12'000.-- frs, cun 31 vuschs persuenter, 8 vuschs encunter e 7 vuschs resalvan.

10. Damonda da credit per revisiun totala dall`ura baselgia s. Andriu Rueun

L`ura baselgia s. Andriu Rueun datescha digl onn 1929, ed ei aunc mai vegnida sutamessa ad ina sanaziun totala. Tenor il rapport da service ei l`ura fetg tschuffa ed era diversas cumponentas ston vegni remplazzadas e sanadas.

Cuosts tenor offerta dalla firma Muff 17'300.-- frs.

La vischnaunca Ilanz/ Glion separticipescha cun 50 % vid quels cuosts.

Damonda per in credit brutto da 18'000.- frs.

La radunanza generala conceda il credit da 18'000.- frs e quei unanimamein.

11. Contract da servitut caplutta s. Antoni, Ruschein

Il contract da servitut denter la fundaziun caplutta s. Antoni Ruschein, 7154 Ruschein ed signur August Josef Schönenberger, 6317 Oberwil b. Zug.

Tenor quei contract conceda la parzella 9188, en posses da signur Schönenberger, il dretg da tschaffar la forza electrica sco era il dretg per la deflusiu dallas auas da meteor en favur dalla fundaziun caplutta s. Antoni Ruschein sin parzella 9187.

Ils cuosts per igl impurtament el cudisch funsil surpren signur Schönenberger.

La radunanza generala vegn informada detagliadamein en caussa e decida unanimamein da ratificar quei contract.

12. Fixar il pei da taglia 2020

Sin proposta dalla suprastonza, vegn decidiu unanim da schar il pei da taglia per 2020 sin 16 % dalla taglia cantunala.

13. Elecziuns (2020-2022)

a) suprastonza da pleiv:

Hugo Schär demissiunescha sco president dalla pleiv. El motivescha sia demissiun sco suonda: El seigi gia varga 20 onns sengaschaus per fatgs dalla pleiv. Ussa seigi el stauchels d'uffeci e vegli surdar quell'incumbensa en auters mauns. La suprastonza deplorescha zun fetg quella demissiun, ha denton cumpleina capientscha per sia decisiun.

Ils ulteriurs commembers da suprastonza Toni Albin, Duri Coray ed Hubertus Spescha ein prompts da schar elegier per in`ulteriura perioda d'uffeci.

Sco niev commember da suprastonza vegn Martin Schnoz Rueun tscharnius.

La suprastonza vegn elegida en globo e quei unanimamein.

Elegi ein:	Toni Albin	Siat
	Duri Coray	Ruschein
	Hubertus Spescha Pigniu	
	Martin Schnoz	Rueun

La suprastonza seconstituescha sezza, Duri Coray ha denton sedeclarau prompts da surprender il presidi.

Plaid da cumiau ed engraziament pil president Hugo Schär

La revisura Claudia Tomaschett ha sin damonda dil vice-president surpriu l`incarica ,da drizzar al Hugo entgins plaids d`engraziament.

Gia dapi igl onn 1999 seigi il Hugo sengaschaus per fatgs dalla pleiv. All` entschatta sco president dil cussegl pastoral. Quella funcziun seigi stada fetg a pèz ad el, cun gronda premura e cun cor ed olma hagi el adempliu quell`incumbensa.

Dapi 2007seigi il Hugo sengaschaus en suprastonza dalla pleiv s. Andriu Rueun e quei sco actuar. Igl onn 2016 hagi ei dau fetg bia lavur da preparaziun per la fusiun dalla pleiv. Gia leu vessi il Hugo atgnomein pli bugen dau giu siu post sco actuar e seconcentraus sin la pastoraziun, mo ord munconza da candidats/as ha el schau surplidar da surprender il presidi dalla pleiv fusiunada.

Entras sia gronda savida ed experientscha davart ils fatgs dalla pleiv e pastoraziun seigi reussiu al Hugo da metter la pleiv fusiunada sin via aschia ch`ella funcziunescha.

La Claudia engrazia al Hugo zun fetg en num da l`entira pleiv e surdat in pign regal.

b) cumissiun da gestiun (revisuras):

Claudia Tomaschett Rueun e Cornelia Coray Ruschein vegnan elegidas unanimamein per in`ulteriura perioda d`uffeci.

14. Tablas da lenn entagliadas per la caolutta s. Gion, Siat

Gion Casanova da Siat ha entagliau sin tablas da lenn tut las staziuns dalla via dalla crusch. Quellas tablas regala el ussa en favur dalla caplutetta da s. Gion. Las tablas duein decorar la caplutta ch`ei scaffida ord betun.

La radunonza generala da pleiv beneventa il regal ed engrazia zun fetg a Gion Casanova persuenter.

15. Orientaziuns

- Las lavurs da sanaziun vid la caplutta da s. Antoni Ruschein ein savanzadas bein. Sin miez settember duein las lavurs esser terminadas.

Per cuvierer tut ils cuosts mauncan actual aunc 26'000.-frs.

-Tier la caplutta s. Clau a Rueun ein ils mirs vegni ligjai giu e colurai niev.

Cuosts 14'000.-frs.. La tgira da monuments surpren 2'100.-frs.

- Niev termin per la creisma a Rueun ei ils 13-09-2020.

- A Lut Ruschein ha ei basegnau ina crusch nova.

- A Siat sper la casa parvenda ha ei dau donns vid la lingia d`aua

- En casa parvenda Rueun habiteschan novs locataris, ina famiglia indigena.

16. Varia

Engraziament a Fidel Lutz per sunar l`orgla a Siat e Ladir. El ha midau domicil ed ha aschia dau giu sco organist.

Il president fa attents ch`ei seigi pli e pli grev d`anflar organists. A Rueun fetgi Michel Cavigelli tier tut sia vegliadetgna aunc grondiusa lavur sco organist.

Michel Cavigelli ei dil meini da dar sura alla medema fatschenta il service per tuttas 4 orglas enteifer nossa pleiv. Quei ha la suprastanza gia mess sin via.

Petra Lechmann, calustra da Rueun sefatschenta cun il tuccar duront igl alzar si. Ei seigi fetg dat ault. La suprastanza pren encounter la remarca.

Finia Blumenthal vul schar dislocar ina statua sco era in maletg ch`ein pér dapi cuort temps exponi en baselgia s. Gieri Ruschein. Motiv: buca adattau. La suprastanza mira tgei che selai far.

Allas 20.45 uras siara il president la radunanza cun engraziar per la preschientscha.

Rueun ils 23-08-2020

president Hugo Schär

actuar Hubertus Spescha